

UGalantiyawa

¹ Nuwana nilime nan nishono nan nya Kipin tigo in Galantiyawa. Meng Bulussari, unan kadura na unuzu kiti nanit ba, a na unuzu kiti nnit ba, unuzu kitin Yisa Kristiari nin Kutelle Uciffe, ulenge na awa fiyaghe nan nya nkul. ² Nin linuana vat na idi ligowe nin mi udu nilarin nlira in Galatiya. ³ Ubollu Kutelle udu kiti mine nin lisosin limang unuzu kiti Kutelle Ucifbit nin Cikilari bit Yisa Kristi, ⁴ na awa ni litime bara alapi bite, anan se a bolo nari nan nya kubiri kunanzang nado ukpilizu Kutelle bit nin Ciff bit. ⁵ Kitimerę ngongong so saligan Usonani. ⁶ Imonen nayi fiu nin kpillu mine nan nya nliru ntucu uburnę na ina seru udu umong ugang. Nin kpillu nati mine kitin lenge na ana yicila minu nin bolun Kristi. ⁷ Na umong ulirun tuchu duku ugang ba, vat nani among anit din fizu ayi nanit inan musuzu ulirun tuchun Kristi. ⁸ Sa arike sa Gono kadura Kutelle unuzu kitene kani nda minu nin kankadura ugang nin lenge na tina malu ubellin minu na unu kifoghe. ⁹ Nafo na tiwa bellin minu nin burnę, nene wang ndin belle tutung, "Asa among bellin minu ulirun ntucu ugan nin le na ina malu useru, tan ghe unu." ¹⁰ Negene meng din pizuru uyinnu nanitari sa un Kutelle? sa ndin pizuru npwo anit ayeri? Asa meng nengene ndi ninsu npwo anit ayeri, na meng kuchin Kristari ba. ¹¹ Bara ndinin su iyinin nuana, ulirun ntuchu na ndin

bellu na un na nitari ba. ¹² Na nna seru kitin nitari ba, a na umon na dursuzai unin ba, una na nadak kitinighe unuzu kitin Yisa Kristari. ¹³ Iwa lanza lisosin nburu nighe nan nya nadini na Yahudawa na nwa ti butan butang nnanzu nliru Kutelle nin na nan ndortu Kutelle, ineo kang sa ligang. ¹⁴ Meng wadi nlibun pit nan nya nadini na Yahudawa nkatiza adon nighe a Yahudawe. Meng wa di nin liyarin kan nbellen dortu matiza naciff ning. ¹⁵ Kubi ko na Kutelle wa lanza nmang afereyi ndutu nan nya liburin naning. Awa yicilai nan nya me. ¹⁶ Adurso Gono me kiti ning, nnan yino ubellun liru me kitik nalumai. Na nwa mala upizuru in yinnu nin kidowo nin mi ba, ¹⁷ ana nwa do u Urushalime kiti na lenge na iwa yarni katawa ba. Nwa do Arabiyari, nnin kpilla u Damascus tutung. ¹⁸ Na akus atat nnin kata, nnin ghana udu lizi ngan Kefas in Urushalima nta ayiri likure nin na taun ligowe ninghe. ¹⁹ Vat nayiri ane nan nta, na nwayene umong nan nya nono katwe ba, ma Yakuburi cas gwanan NCikilare nwa yeneghe ku. ²⁰ Yenen nbun Kutelle wang, na ndimunu kinu nan nya niyerte na nsu minu ba. ²¹ Nin kiddughe nmini wa do nmin Siriya nin silisiya. ²² Vat nani nan nyan Yahudiya alenge na iwa dortu nan nya nilarin nlira wa di isa yinni ba. ²³ Iwa din lanzun belle nighere cas, " Ulenge na awa nadi unan lantizu nari ukul nengene din su uwazi in yinnu ulenge na ame wadin musuzun unin." ²⁴ Inani wa tizu Kutelle gongong bara mewe.

2

¹ Na akus likure nin na nas nnin kata, nkuru in ghana u Urushalima nin Barnabas, in yira Titus ku ti gya ligowe. ² Nwa ghana ndo bara na Kutelle wa dursoi ndo. Nwa durso nani kanang uliru tucu ulenge na ndin bellu kitik nalumai. (Nwa su ulire likot nan nadidya mine). Bara katwa ninghe na imalsu, nin ka na nma kuru nsu wa so hem. ³ Ko ame Titus na awadi ninmi, na awadi ku Hilinawa, iwa tighe akala kucuhru gbas. Nani wa se nani, ⁴ Bari nuana kinu na iwa dak likire ida idayen lissosin limang bit na tiwa dimun nan nya Kristi Yisa. Iwa dinin su iti nari tiso acin kiti nduka. ⁵ Na arik nani ati kitimine ba ko nin kubiri bat, bara kidegen nlrhun tuchu nan so kitimine sa ukpillu. ⁶ Inung alenge na among na woro inughere anan bune na ina su imonmonba. Sa iwa di iyaghari kiti nin na imonmonari ba. Na Kutelle din sesu imon ile na idin su kibinayi nnit usurne ba. ⁷ Bara nani wang mere ina ni ulirun tuchue udu kiti na nan nacuru, nafo Bitrus na iwa nigne ucindu kiti na nan kalzu nacuru. ⁸ Bara Kutelle, na anasu kata nan nya Bitrus gono kadura kiti nalenge na ina kalza acuru nanere wang ana su katwa nan nya ning udu kiti nalumai. ⁹ Na iwa yinnin ubolle na Kutelle nasui, Yakub, Kefas, nin Yuhana, alenge na iwa yiru nani adidya liyissin wa Barnabas ku nin mi ucara ncine lidondong. Bara arik nan do kiti nalumai inung do kiti na nan kalzu nacuru. ¹⁰ Tutung iwa di ninsu ti lizinin nin nikimon, imon ilenge na meng wang wadi nisu nsure ine kang. ¹¹ Kubi ko na Kefas wa dak Antakiya, Nwa

yisin nmuro me nbellinghe uliru bara na awa tån. ¹² Kefas wa din lizu nimonli nin nalumai, a among anit unuzu kitin Yakub dutu sa udak. Na anit ane nda, a wunno kidowo anin tasa ligome nin na Lumaiye, bara fiu nanit ale na inamalu kalzu nacuru mine. ¹³ Nanere wang ngisin na Yahudawę wa dofin Kefase ku nan nya nrusuzu nati. Nanere Barnabas wang litime wa dofin nani nan nya kani karusuze. ¹⁴ Na nwa nin yene nwo na idin dortu kidegen nloru tucuba, Nbelle Kefase ku nbun mine vat, "Andi fe na udi ku Yahudawa umini sosin nafo kilumai na nafo ku Yahudawa ba, iyizari udin tizzu Alumai iso nafo a Yahudawa?" ¹⁵ Arike na tidi a Yahudawa unuzu kumat a na "Alumai yari anan nalapi ba." ¹⁶ Yinnon nenge na umong unit duku na ama sortu nacara nkul bara katwa nin dortun duka ba se nin yinnu sa uyenu nan nya Yisa Kristi. Tina dak nan nya in yinnu sa uyenu in Kristi Yisa bara tina se usurtu unuzun in yinnu sa uyenu nan nya Kristi na nin nitwa nduka ba, bara kusari nduka na unan lai urum ba surtuba. ¹⁷ Vat nani andi konene tiba pizuru Kutellę tınan se usurtu nan nya asa tise atibite anan nalapi, Kriste nso unan katwa kulapı? Na nanere ba! ¹⁸ Bara andi meng ba kuru in wutu kimal In yinnu nin duka tutung, uyinnu ule na ina nari, meng so unan patulu nduka. ¹⁹ Bara nan nya nduka, meng na ku kulin duka, nnan so nin lai kiti Kutellę. ²⁰ Iwa kottini kitene kucca ligowe nin Kristi. Na mere nene ming litininghe ba, unin ulai ulenge na in dumun nan nya kidowo, nsosin nan nya in yinnu sa uyenu in Gono Kutellę, ule na ana ti

usu ning anä litime bara meng. ²¹ Na meng nati nin bollu Kutelle hem ba, bara adi uyiti nlau din nuzu ndukari, ukul in Kristi nso hem.

3

¹ Anung anan Galantiyawa alalang, ghari na su minu tikanci? Anung na iwa bana Yisa Kristi ku niyizi mine kitene kucha, ikotinghe tikusa niyizi mine? ² Ilelere cas in di nin su iyininin kitimine. Ina seru uruhe nan nya dortu dukaria sa bara uyinnu nin nilemmon na ina lanzari? ³ Idi alala kan naniya? Ina cizin nan nya nruhu inani ma malzunu nan nya kidowa? ⁴ Ina sono uniu nin nimon gbardang nani hemma, andi nanere hemmaria? ⁵ Andi nanere ame ule na adin nizu minu uruhue, amini din su katuwa nakara nan nya mine, unuzun ndortun ndukaria sa unuzun in lanzu lirun yinnu sa uyenuari? ⁶ Nafu na Ibrahim “wa yinnin nin Kutelle, inani wa batizaghe mun nafu fiu Kutelle.” ⁷ Nene nuwana, yinnon ale na iyinna nonon Ibrahimari. ⁸ Ulirue di ina malu uyinnu Kutelle ma su anan salin dortume ushara nnuzu yinnu sa uyenu minere. Ina belli ulirun tuchun nnuzun Ibrahimme uworsu nenge, “Kitifere vat anan salin yiru Kutelle ima ti nani nmari.” ⁹ Nanere ale na ina yinnin sa uyenu idi nin mari nin Ibrahim, ana yinnin sa uyenu. ¹⁰ Ngbardang na lenge na idin su katuwa nshara nin kidowo imase ula'ana. Bara ina yertin “Unan la'anari unit ule na adi su vat nimon ile na ina nyertin nan nya niyerte nduka ba.” ¹¹ Nene udi kanan na Kutelle ma ti umong se usurtu bara uduka ba, “Bara unit ulau

mati ulai unuzun yinnu sa uyeneri.” ¹² Na uduka di unuzun yinnu sa uyenuari ba, una di, “Ule na adin dortu uduke mati ulai nan nya duke.” ¹³ Kristi na seru nari nan nya kitin lla'ana nduka na ame wa so ula'ana bara arik, na ina nyertin, “Vat in nit ule na ibanaghe kucha unan la'anari.” ¹⁴ finu nlire wadi alumai ban se nmari unuzun nan nya Kristi Yisa, bara tinan se userun likawali nruhu unuzun yinnu sa uyenu. ¹⁵ Linuana, idin liru nafo anit. Andi ma unitari na tti nsue, asa iwutu kimal nin na unan sakue dukuba a na unan kpinu ma duku ba. ¹⁶ Nene usunu nnuwe iwa belli Ibrahim ku nin kuwunu me. Na iwa woro “awunuari ba” nafo adi gbardang, kunin kurumari cas, “nani udu kuwunu fe,” kristiari une di. ¹⁷ Nene in din bellu usunu nnuwe na Kutelle na malu wutu kimale na ana musuzu unin nin duka ule na uwa dak kimal nakus akalt anas nin nakut atat ba (430). ¹⁸ Andi ugadue wa dak unuzu kitin ndukari, uso na unuzu kitin nsunun nuwari ba. Bara Kutelle na ni unin top kitin Ibrahim unuzun nsunun nnu. ¹⁹ Bari iyaghari inani? Inan kpiku bara ukaluzun liru, se kuwunu kon go na ina sun kunin unuwe nda kiti nale na ina sun nani unuwe, iwa cizin katuwa nin duke kiti na nan kadura Kutelle kiti nacaran nnan piru kitik. ²⁰ Nene na unan piru kitike unit urumari ba, Vat nani Kutelle kurumari. ²¹ Nane uduka din serzu tikot nin sunu tinu Kutelle? Na nanere ba! Andi iwa ni uduka ule na uwasa una ulai, kidegen fiu Kutelle wa dak unuzun dukari une. ²² Vat nani uliru ulau in yatca imon vat nan nya kulapi. Nani usunun nnu Kutelle nworu a tucu nari nnuzu in

yinnu sa uyenu nan nya Yisa Kristi iwa ni aļe na iwa yinnin. ²³ A uyinnu sa uyenu nin Kristi dutusa udak, iwa yachu i nyeshe nari nin duka udu kubin nutunu in yinnu sa uyenu. ²⁴ Uduke uni waso unan rissu nari udo mun kitin Kristi, tinan se usurtu unuzun yinnu sa uyenu. ²⁵ Nene na uyinnu sa uyenu na dak, nati du nworu irissu nari ba. ²⁶ Bara anung vat nono Kutellari unuzu in yinnu sa uyenu nan nya Kristi Yisa. ²⁷ Vat ligan nale na ina shintu minu nmyen nan nya Kristi, ina shon atimine nan nya Kristi. ²⁸ Na ku Yahudawa duku ba ana ku Helenawa ba, na kucin dukuba, a na usaun ba, na kilime sa kishono ba, vat mine arumer nan nya Kristi Yisa. ²⁹ Andi anung anit in Kristiari, iso kuwunun Ibrahimari une, anan lin gadu unuzun sunnun nü

4

¹ Ndin bellu nenge andi unan gadue gonari, na adi ugan nin kucin ba, andi amere unan nimone vat. ² Vat nani adi nacara na nan yenju nin na nan dortu ninghe uduru kubi kongo na ucife na ceo. ³ Arike wang nanere kubi kongo na tiwadi infitu, iwa min nari nan nya licin nadu in yi. ⁴ Nani na kubi wa dak dert Kutelle tō Gono me, unuzu kitin wannu, kumatt nan nyan duka. ⁵ Anan se utucu nale na iwa di nan nyan duka, tinan se useru lisosin nafo nono. ⁶ Bara na anung nonari, Kutelle na tü nin Ruhunin Gono me nan nya nibinayi bite, ule na udi yicu "Abba Ucif." ⁷ Bari nani, na udi kucin ba, uso gono, andi udi gono, uso fe unan gaduari unuzu Kutelle. ⁸ A

idutu, na iwadi isa yinno Kutellè ba, iwa din licin na lenge na iwa di atellè ba sam. Nene na iyinno Kutellè. ⁹ Nene na iyinno Kutellè, sa negene na Kutellè yiru minu, in yaghari nta idin kpilzunu tuyung kiti nimon ile na idi (anfaniba) ba? Idi nin su ikuru i kpilin licin tutungha? ¹⁰ Idin dortu among ayiri na ina fere, iceo likot tipui tipese, kubi, nin nakus. ¹¹ In din lanzu fiu nin ghinu, in din lanzu nfong fiu bara uwa da so nafo ndi su katuwa nan ghinu hem. ¹² Ndi minu kucukus linuana, yitan nafo meng, nafo nameng wang nso nafo anughe. Na ina tanni ba, ¹³ iyiru bara udiru kayiri kidowo nwa su minu ulirun tucu nin kubie na nwa cizin. ¹⁴ Ile imon nan ina so ujaraba kiti mine unuzu liti ning na ina yassu ba, ana ina niari ba, vat nin nani ina na serui nafo gono kadura Kutellè, sa nafo ima seru Kristi Yisa ku. ¹⁵ Ani, nene liburi libo mine din we? Bara meng bellin minu fo useri iwa kaluzu ijiji mine wang inayi. ¹⁶ Ani nene in ni so udon nivira mins bara na in bellin minu kidegengha? ¹⁷ Inughe na pizuru minu kang a na nimon icine ba. Idi nin su ikosu minu nan mi inan dofino nani. ¹⁸ Ucaun iyita nin nayi asheu nin likaea kiti nimon icine ko kome kubi na macas meng wa di kiti mine ba. ¹⁹ Nono nin nibebene, ndin niu nin piu nin pazaza bara anughe tutung, sei Kristi nse lisosin nan nya mine! ²⁰ Ndi nin su nwa yitu ku ligowe nan ghinu kikane nene nkpilla liwui nighe, bara kibinayi nighe non ni ghinu ba. ²¹ Bellen ni anung na idin pizuru uyitu nan nya nduka, na ilanza imon ile na uduken belle ba? ²² Nafo na iyerte di au Ibrahim wadi nin nono

niba, kirum kitin wani katuwa ngame a kirum kitin wani nilugma. ²³ Vat nin woro kin wani kata kilare iwa maru kinin nan nya kidowo, a kinin kin qani nilugme iwa maru kinin unuzu likawali. ²⁴ Ullenge ulirue kuyeli nimon ibari na iwasa ipuno ining kanang. Awani alele abe masin uchiwu nliru ubari, kirum unuzu likup in Sinai. Ulele mara nono licin. ule na amere Hajaratu. ²⁵ Nengene Hajaratu likup in Sinai yari in Arabiya linnare so nafo Urshalime kitimone, adi nan nya licin nin nono me. ²⁶ Nani uni Urshalima ulenge na udi kitene kani na udi licin ba, unnare una bite. ²⁷ Nafo na iyerte di, "Ta ayi abo, fe uwani in sali kumat, fe ulenge na una maru ba; Suna kibinayi usanfi uti ntet nayi abo, fe ulenge na uyiru ukonu liburi kumat ba; Bara na nono nnan sali kumate din gbardang, ni katin nin le na adi nin less. ²⁸ Arik nene, nuwana, nafo Ishaku, nono likawaliari. ²⁹ Nafo na uwadi, ulenge na iwa marughe nan nya kidowo din ti ulenge na ina marughe nan nya Ruhu Kutelle aneo, nanere udi wang nene. ³⁰ Uliru Kutelle nworu iyaghari? Kọ uwani licine nin gono me. Bara na gono in wani licin bali ugadu ligowe nin wani nilugma ba. ³¹ Bara nani nuwana, na arik nono nwani licinari ba, nani arik na di nonon nwani nilugmari.

5

¹ Bara lisosin liwosarinKristi na bunku nari. Bara nani yissinan nin nakara na iwa yinnin tutung ikuru i pira tikanci ba. ² Yeneng, Meng, Bulus, nworu minu asa ina kalza minu acuru cas,

na Kristi ma so imon imon kitimine ba. ³ Tutung ndin bellu udu kitin ko uyeme unit ulenge na ina kala ghe kucuru usoghe gbas adofin uduke vat. ⁴ Na nmyen mine duku nin Kristi ba, vat na lenge na idinin sü ise utuchu kitin nduka, anun wulu kitin ballu Kutelle. ⁵ Bara kitin Ruhu nan nya yinnu sa uyenu ti din cha nayi akone nan nya lissosin lilau. ⁶ Nan nyan Kristi Yisa sa ukalu kucuru, sa usalin kaue na unare imon imong ba. Nani nan nya katuwa in yinnu sa uyenuari cas unare imon. ⁷ Ina su ucume gegeme. Ghari nin na wantin minu ulanzun liru kidegen? ⁸ Ukpilliu nibinayi mine nani na kitin nlenge na a yicila minuari ba. ⁹ Uyist cingiling asa umala kiti nan nya likalan vat. ¹⁰ Idi nin nayi akone litime nan nyan Cikilari nin woru na iba su umong ukpilizu ugang ba. Ulenge na ata minu inani ta shogolak a yaunu ushara litime, ko ame ghari. ¹¹ Linuana asa har idin su uwazin kalu kucuru, in yaghari ta nmini din niu uda duru ko kubę? uma nin so ikala imon ntizu ntiruzue kuca nkotine. ¹² Meng dinin su alenge na idin wultuzunu minu tassa ati mine kiti mine. ¹³ Bara Kutelle na yicila minu linuana, wos se dei na iwa katwa nin yitu wos mine bara kidowo ba, ama nan nya nsü buzunon ati. ¹⁴ Bara na uduke vat pitirin nan nya duka urum, nan nya nin "uma yitu nin sü nnan kuponfe nafo litife." ¹⁵ Asa idin kifizu nu ileo inawa nati, sun esn bara iwa molusu ati mine. ¹⁶ Uliru nin ule, cinan nan nyan Ruhu bara iwa ni kidowo imon nsü me. ¹⁷ Bara na kidowe din cinu ugang nin Ruhu, a unin u Ruhu cina ugang nin kidowo inughe naba din su ivira nin nati. Bara

iwa su imon ilenge na idi nin sun sue. ¹⁸ Andi u Ruhu di ligowe nan ghinu, na idi nan nyan duka ba. ¹⁹ Nene adadu kidowo di kanang. Annare unozu nin na wani, lidu lizemzem, ²⁰ licin ncil, usu niyiu, ivira nati, ufirun liru, liyarin, tinana nayi, usalin munu nati, umatu kiti, uwutuzunu, kibinai kisirne, ²¹ umolu ntoro, idogwoi, nin nimuse ni le imone na ina wunun minu atuf mun, nafo na uwa malu uwunun atufe mun, alenge na idin su imus ni le imone na iba piru kipin tigoh Kutelle ba. ²² Kumatin Ruhu tutung kunanare usü, ayi abo, lisosin lisheu, ayi asheu, usali tinanayi, lisosin licine, uyinnu sa uyenu, ²³ usalin bardada, nin kifu liti. Imus nalele na ushara di nati mine ba. ²⁴ Inung tutung alenge na idi anitin Kristi Yisa ina bana kidowo nin tok kinin a imon inanzang nsü kinin. ²⁵ Adi tisosin nin Ruhu na ti cinu ligowe tutun nin Ruhu. ²⁶ Na tiwa so anan karusuzo ba, tifiza ati ayi, sa tiso in shina nati.

6

¹ Linuana, adi ise kan gwana nan nya kulapi, among mine na idi nin Ruhu nan nya nibanai nruhu usheu sun lito me i kpiling nin ghe. Fe litife su seng, bara fe litife wang wa se imon tin diwu. ² Yaunan atura nati, nanere ima kulu uduka in Kristi. ³ Andi umon din yenju ame imomonari ana ame imomonari ba, adin rusuzu litime. ⁴ Na kogha mine dumun katwa litime usamme. Amanin se imon nfo figirime, na nin woru abata litime nin mong ba. ⁵ kogha ba yaunu kutura litime. ⁶ Na ulenge na idin

dursuzu ghe ti gbas akosu imon ichine vat nin nan dursuzu me. ⁷ Na iwa rusuzu atimine ba, na idin kpeshu Kutelle ba. Vat nimon iilenge na unit nbilsa inin nare ama kowu. ⁸ Ulenge na a bilsa nan nya kidowo me, nan nya kidowo ama kowu ibishe, ame ule na a bilsa nan nya Ruhu, unuzu kitin Ruhu ama se ulai sa ligang. ⁹ Na tiwa dira nin su katwa kachine ba, wasa kubi nda dert tima su kachiso andi na tisu kuballa ba. ¹⁰ Bara nani, nene nati di nin kubi, na tisu anit imon ichine vat. Alle na idi nan nya nanan yinnu sa uyenu inughere iba katinu nin suani. ¹¹ Yeneng ngbagbardang niyolit niyerte na nna yerting minu nin chara ning. ¹² Vat na lenge na idi nin su idurso nchaut katwa kidowo ma timunu gbas ikaliza acuru mine. ¹³ Bara uleli utiere cas, na inung wa sono gbagbai bara ubanun Kristi ba. Bara inung wang na ina kaliza acure na idin uduke ba, nani inung dumun su ikala minu acure, inung nan fwang igiri nan nya nidowo mine. ¹⁴ Na uwa so meng din fwang figiri se dei nin banun Cikilari bit Yisa Kristi kitene kucha, ulenge na bara menku uyi nnuzu me, a uye tutung ina bana uni ku meng. ¹⁵ Bara ukalu kucuru nin salin kalu kucuru imonmonari ba, umaru fe upese unare imon ichine. ¹⁶ Vat ngbardang na lenge na ina sunucin nan nya lo libauwe, na lissosin limang nin nayi asheu so nanghinu, a nonon Israila Kutelle. ¹⁷ Uchizunu nene udu ubun, na umon wa ti sururu ba, bara nan nya kidowo nighe ndi nin niyoliti Yisa kidowo ni. ¹⁸ Na ubollun Yisa Kristi so nin ruhu mine, linuana. Usonani.

Amo New Testament
The New Testament in the Amo language of Nigeria
copyright © 2020 Door43 World Missions Community

Language: Timap (Amo)

Translation by: AFenlason, ALHASSAN SUDA, Chrispher Ishaya, James, Kawusu David, Pungs Makarios, Zephaniah A. Isau, tab04-nig, tab12-nig

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-07-06

PDF generated using Haiola and XeLaTeX on 11 Nov 2022 from source files dated 6 Jul 2020

cb0040a9-2597-55c7-975b-461d5a397911